

Evening Dogri (NSD) Bulletin 06-04-2024

आकाशवाणी

खास खबरां जगमोहन शर्मा कोला।

- 1 भाजपा दे वरिष्ठ लीडर ते प्रधानमंत्री नरेन्द्र मोदी होरें मेद प्रगट कीती ऐ जे एनडीए सरकार इक बारी परतियै सत्ता च औग ते उंदे त्रीए कार्जकाल दे 100 दिनें दे अंदर-अंदर केई बड्डे ते महत्वपूर्ण फैसले लैते जांगन।
- 2 रक्षा मंत्री राजनाथ सिंह होरें देशवासिएं गी जकीन दोआया ऐ जे साढे सब्बै बन्ने पूरी चाल्ली सुरक्षत न।
- 3 विदेश मंत्री डॉ. एस.जयशंकर होरें आक्खेआ ऐ जे 17 भारतीय श्रमक जिनेंगी लालच देइयै टेरियै लाओस च असुरक्षत कम्मं च लाया गेदा हा, उनेंगी मुख्य वापस आन्नेआ जा'रदा ऐ।
- 4 दिल्ली दी इक अदालतै आम आदमी पार्टी दे नेता ते दिल्ली दे साबका उपमुख्यमंत्री मनीश सिसोदिया दी न्यायिक हिरासत दी अवधि बघाई दित्ती ऐ।
- 5 सीबीआई ने लौहके बच्चे दे खरीद फरोखत ते तस्करी करने आले इक गिरोह दा पता लाया ऐ।

<><><><><><>

PM-Rally

बीजेपी दे वरिष्ठ नेता ते प्रधानमंत्री नरेन्द्र मोदी होरें भरोसा प्रगट कीता ऐ जे मुख्यै च इक बारी परतियै एनडीए दी सरकार औग ते अपने त्रीये कार्जकाल दे पैहले 100 दिनें दे अंदर केई बड्डे ते महत्वपूर्ण फैसले लैते जांगन। अज्ज राजस्थान दे पुष्कर च इक जनसभा गी संबोधत करदे होई मोदी होरें आक्खेआ जे पिछले 10एं ब'रें च कीते गेदे कम्मकार शडे इक नमूना ते असल ते मता किश कम्म कीता जाना अजे बाकी ऐ। इसलै प्रधानमंत्री उत्तर प्रदेश दे गाजियाबाद च इक रोड शो करा करदे न। उत्तर प्रदेश दे मुख्यमंत्री योगी आदित्यनाथ बी उंदे कन्नै न।

<><><><><><>

Rajnath Campaign

रक्षा मंत्री ते बीजेपी दे वरिष्ठ नेता राजनाथ सिंह होरें देशवासिएं गी एह जकीन दोआया ऐ जे मुल्ख दे बन्ने पूरी चाल्ली सुरक्षत न। मध्यप्रदेश दे सिंगरौली च इक जनसभा दरान अज्ज भाषण दिंदे होई उनें आक्खेआ जे कांग्रेस दी हकूमत दरान कुसै ना कुसै राज्य च आतंकवादी घटना पेश औंदियां हिआं पर उंदी सरकार नै इनेंगी तगड़ेयाई कन्नै रोकी दित्ता ऐ। विपक्ष पर जबानी हमला करदे होई राजनाथ सिंह होरें आक्खेआ जे कांग्रेस ते ओहदी गठबंधन पार्टिएं दे नेताएं लोकें गी भड़काने ते नफरत फैलाने दा कम्म कीता ऐ। उनें आक्खेआ जे बीजेपी कदे बी धर्म जां जाति दी बिनाह पर फर्कोफर्की नेई करदी। उनें आक्खेआ जे मध्यप्रदेश दी डबल इंजन सरकार देसै दी तरक्की च महत्वै आली भूमका नभाई सकदी ऐ। उनें आक्खेआ जेकर तुस जनसंघ दे समें कोला उंदा घोषणा पत्र दिक्खगे तां एह पता लग्गोग जे बीजेपी नै जो किश बी आक्खेआ, उसी करियै बी दस्सेआ ऐ। इक राष्ट्र इक चुनां दे हक्क च बोलदे होई उनें आक्खेआ जे उंदी पार्टी दा मन्नना ऐ जे एहदे कन्नै देश मजबूत होग। राजनाथ सिंह होरें आक्खेआ जे इस बवस्था कन्ने लोक अपने वोट दा बेहतर इस्तेमाल करी सकगंन।

<><><><><><>

Jaishankar-LAOS

विदेश मंत्री डॉ. एस.जयशंकर होरें अज्ज आक्खेआ जे 17 भारती कम्मगार जेहडे लाओस च असुरक्षत ते गैर कनूनी कम्मं दे झांसे च फसी गेदे हे, ओह वापस भारत परतोआ करदे न। इक सोशल मीडिया पोस्ट उप्पर डॉ. जयशंकर होरें लाओस च भारती दूतावास ते उत्थुं दे अधिकारिएं दा उंदे सैह्योग लेई धन्नबाद कीता।

<><><><><><>

BJP-Delhi

प्रधानमंत्री नरेन्द्र मोदी हुंदे नेतृत्व च पिछले इक दहाके दरान आए दे बड़े मते सकारात्मक बदलाव गी प्रमुखता कन्ने उजागर करने दे मकसद कन्नै दिल्ली बीजेपी युवा मोर्चा आस्सेआ इक नमीं वेबसाइट "ट्रांसफार्मिंग भारत" दी शुरुआत कीती गई ऐ। इस मौके बीजेपी दे प्रदेश अध्यक्ष वीरेन्द्र सचदेवा नै सरकार दिएं पैहलकदमिएं दे बारे च जनता गी जागरूक करने च नोजवानें दी भूमका ते हिस्सेदारी पर जोर भरेआ। उनें प्रधानमंत्री मोदी हुंदे राष्ट्र निर्माण दे पक्के धेइयै ते बीजेपी दे कार्जकाल च बक्ख-बक्ख क्षेत्रें च हाई दी तरक्की ते हासल उपलब्धिएं पर लोह पाई। सचदेवा होरें दस्सेआ जे औने आले दिनें च युवा नेता

दिल्ली दे 70 विधानसभा हल्के दा दौरा करगंन ते बीजेपी दे कार्जकाल दरान होए दे विकास कर्में दे बारे च जनता गी जागरूक करगंन।

<><><><><><>

AAP-BJP

आम आदमी पार्टी नै मुखमन्त्री अरविंद केजरीवाल ते पार्टी पर कथित झूठे आरोप लाने लेई बीजेपी दी सख्त नुख्ताचीनी कीती ऐ। नमीं दिल्ली च पार्टी नेता आतिशी नै बीजेपी पर आम आदमी पार्टी दे नेताएं गी कमजोर करने लेई प्रदेश दी मशीनरी दा गलत इस्तेमाल करने दा अरापे लाया। उनें दावा कीता जे प्रवर्तन निदेशालय गी शराब नीति घोटाले आले मामले च कोई पैहा कोई रकम नेई थ्होई। आतिशी होरें आक्खेआ जे गोवा दी अदालतै अरविंद केजरीवाल हुंदे खलाफ मामले गी रद्द करी दित्ता ऐ। उनें आक्खेआ जे बीजेपी जेकर आम आदमी पार्टी कन्ने मकाबला करना चांहदी ऐ तां उसी राजनीति दे युद्ध क्षेत्र च उतरना लोड़चदा। तोआई बीजेपी नै आम आदमी पार्टी पर जवाबी हमला करदे होई आतिशी होरें गी इक झूठी कहानीकार दस्सेआ। दिल्ली प्रदेश बीजेपी दे अध्यक्ष वीरेन्द्र सचदेवा होरें आक्खेआ जे आम आदमी पार्टी नै आर्थिक वसीलें दिएं जरूरतें गी पूरा करने लेई नमीं शराब नीति बनाई ही। उनें पुच्छेआ की जेकर शराब नीति च कोई गड़बड़ी नेई ही तां फही सीबीआई दी जांच कोला पैहले केजरीवाल सरकार नै उसी वापस लैने दा हुक्म कीह जारी कीता।

<><><><><><>

Lakshdeep Election

मतदाताएं दी गिनतरी दे लिहाज कन्ने मुलखे दे सब्बने शा लोहके संसदीय हल्के लक्ष्मीप च पैहले गेड़ तैहत 19 अप्रैल गी वोट पाए जांगन। इस केन्द्र शासत प्रदेश च इक्के लोकसभा सीट ऐ। जेहदे लेई कुल 4 मेदवार चुनां मैदान च न। एह सीट कन्ने अनुसूचित जनजाति लेई बी आरक्षत ऐ। मजूदा सांसद ते राष्ट्रवादी कांग्रेस पार्टी शरद पवार गुट दे मोहम्मद फ़ैसल, साबका सांसद ते भारतीय राष्ट्रीय कांग्रेस दे हम्दुलिल्लाह सईद, बीजेपी दे समर्थन आली राष्ट्रवादी कांग्रेस पार्टी अजीत पवार गुट दे टी.पी. युसफ ते अजाद मेदवार के.कोया इस सीट लेई मेदवार न।

<><><><><><>

Election 2024

भारत दा जीवंत लोकतंत्र वोट पाने दे अधिकार दे मामले च पूरी दुनिया गी बत्त दस्सने आला रेया ऐ। उआं चुनावी भागीदारी च लैंगिक बरोबरी दी यात्रा शानदार ते चुनौतिएं कन्नै भरोची दी दौनें चाल्ली दी रेही ऐ। सन् 1952 च होए दे मुख्य दे पैहले आम चुनाएं च तकरीबन 80 लक्ख महिलां मतदाता अपनी पंछान दा ब्यौरा नेई देई सकियां हियां। उस बेल्ले चुनां आयोग गी इक अनोखी समस्या दा सामना करना पेआ हा। केई महिलाएं अपने परोआर दे मर्दे दे नाएं पर अपना पंजीकरण करोआया हा जेहड़ा उस बेल्ले दे समाज दी गतिशीलता गी दर्शादा हा। मजूदा दौर च एह स्थिति मती हदै तोड़ी बदली गेदी ऐ। 2019 दे लोकसभा चुनाएं च रिकार्ड 67.18 फीसदी महिलाएं मतदान कीता जेहड़ा समाजी मानदंडें ते जागरूकता च इक महत्वपूर्ण तब्दीली दा प्रतीक ऐ। 2009 दे बाद चुनावी भागीदारी च लैंगिक बित्थ गी पंछान होई चुनां आयोग नै स्वीप अभियान रंभेआ हा। आदिवासी जिलें च महिला मतदार रैलिएं दे आयोजन थमां लेइयै जम्मू कश्मीर च मदर इंडिया अभियान शुरू करने तगर मतदाताएं गी शामिल करने ते जागरूक बनाने लेई लोडचदी रणनीति लागू कीती गई। इस बरे दे लोकसभा चुनाएं च एह तब्दीली साफ नजरी आवै करदी ऐ की जे 12 राज्यें च मर्दे दे मकाबले महिला मतदाताएं दी गिनतरी मती ऐ ते एह भारत दी लोकतांत्रिक यात्रा च इक मील दा पत्थर ऐ। इस बारी दे लोकसभा चुनाएं च 47 करोड़ शा मती महिलां वोट पाने दे अपने हक्क दा इस्तेमाल करने लेई तैआर न।

<><><><><><>

Sisodia Custody

दिल्ली दी इक अदालतै दिल्ली दे साबका उपमुख्यमंत्री ते आप आदमी पार्टी दे नेता मनीष सिसोदिया दी न्यायिक हिरासत गी इस म्हीने दी 18 तरीक तगर बघाई दित्ता ऐं सिसोदिया दिल्ली आबकारी नीति धोखाघड़ी दे मामले कन्नै जुड़े दे काले धनै गी जायज बनाने दे मामले च जेल च बंद न। इस मामले च इक होर आरोपी आम आदमी पार्टी दे नेता संजय सिंह बी अज्ज विशेष जज कावेरी बावेजा हुंदे अग्गे पेश होए। संजय सिंह गी हाल च गै सुप्रीम कोर्ट नै जमानत दित्ती ऐ।

<><><><><><>

Congress List

कांग्रेस नै औंदे लोकसभा चुनाएं आस्तै 6 मेदवारें दी सूचि जारी कीती ऐ। पार्टी नै उत्तरी गोवा हल्के थमां रमाकांत खालप गी दक्खनी गोवा हल्के थमां कैप्टन विरियोटो फर्नांडिस गी

मेदान च तुआरेआ ऐ। सत्यपाल सिंह सिकारवर मध्यप्रदेश दे मोरेना थमां ते प्रवीण पाथल ग्वालियर हल्के थमां चुनां लडगंन।

<><><><><><>

CBI

केन्द्री जांच ब्यूरो सीबीआई नै पूरी भारत च लौहके बच्चें दी तस्करी दे नेटवर्क दा पर्दाफाश कीता ऐ। सीबीआई नै दिल्ली ते हरियाणा च 7 थाहरें पर तलाशी लैती। आपरेशन दे दरान सिर्फ डेढ़ दिन ते 15 दिन दे दऊं जागतें ते इक म्हीने दी बच्ची गी बचाया गेआ ऐ। तलाशी दरान साढ़े 5 लक्ख रपे नगद ते होर दस्तावेज बरामद कीते गे न। सीबीआई नै 7 अरोपिएं गी गिरफ्तार बी कीता ऐ।

<><><><><><>

VP-RS Oath

भाजपा दे राष्ट्रीय अध्यक्ष जे.पी.नड्डा हुंदे समेत 5 नमें सांसदें अज्ज राज्यसभा दे मिंबर दे तौरा पर सगंध चुक्की। उपराश्ट्रपति ते राज्यसभा दे चेयरमैन जगदीप धनखड़ होरें इनें सदस्यें गी सगंध चुकाई। अज्ज सगंध चुक्कने आलें च बीजेपी थमां अशोक राव, शंकर राव चव्हाण ते चुन्नी लाल गरासिया, तृणमूल कांग्रेस थमां सुष्मिता दे वते मोहम्मद नदीम उल हक ते कांग्रेस थमां अनिल कुमार यादव मंदादी शामिल न।

<><><><><><>

BJP-Foundation Day

बीजेपी दे वरिष्ठ नेता ते प्रधानमंत्री नरेन्द्र मोदी होरें होर दुए वरिष्ठ बीजेपी वरिष्ठ लीडरें, अमित शाह ते जे.पी.नड्डा हुंदे कन्नै बीजेपी दे सब्बने कार्यकर्ताएं गी पार्टी दे 45में स्थापना दिवस उप्पर शुभकामनां दित्तियां न। अज्ज इक सोशल मीडिया पोस्ट उप्पर मोदी होरें कार्यकर्ताएं दा उंदी मेहनत ते बलिदान आस्तै धन्नबाद कीता जेहदी बदौलत पार्टी नै केइएं बरें दे संघर्ष दे बाद एह् थाहर हासल कीती ऐ। उनें आक्खेआ जे पार्टी गी एनडीए दा अन्नत्रुट्ट हिस्सा होने दा मान ऐ। ताई अमित शाह होरें बी पार्टी कार्यकर्ताएं दा पार्टी गी दुनिया दी सारें कोला बड्डी पार्टी बनाने लेई धन्नबाद कीता। जे.पी.नड्डा होरें संघर्ष च शामिल पार्टी दे वरिष्ठ नेताएं गी श्रद्धांजलि भेंट कीती।

<><><><><><>

Rajouri Search Operation

फौज दे जुआनें राजौरी जिले दे इक ग्रां च अपने कैंप दे नेड़े अज्ज बडलै मुंह-न्हेरे संदिग्ध नकलो-हरकत दिक्खियै किश गोलियां चलाइयां ते फही इलाके च तपाशी अभियान बी रंभेआ। सूत्रें मूजब द्रहाल इलाके दे सरोथा मोड़ा ग्रां च इस गोलीबारी दरान कुसै दे मारे जाने दी रिपोर्ट नेई ऐ। सूत्रें दस्सेआ जे फौजी कैंप दे संतरी नै किश संदिग्ध लोकें गी कैंप बक्खी औंदा दिक्खियै किश राउंद गोलियां दागियां। जेहदे परैंत संदिग्ध लोकें दा एह समूह नेड़े दे ग्रां बक्खी नस्सी गेआ। अधिकारिएं दस्सेआ जे फौज नै एहदे मगरा इलाके च तपाशी अभियान रंभेआ पर खीरी रिपोर्ट थ्होने तोड़ी कुसै बी संदिग्ध बारे किश पता नेई लग्गे दा हा। अधिकारिएं मूजब सुरक्षाबलें अज्ज बडलै शाहदरा शरीफ इलाके च बी तपाशी अभियान चलाया ऐ पर कुसै गी बी गिरफ्तार नेई कीता गेआ ऐ।

<><><><><><>

Read: Jagmohan Sharma

Stand By:- Vijay Bajaj & Nirmal Vikram

D.E.O. : Mukesh Gupta

Skilled : Tarsem

Editor : Ashok Kumar Mota

